

Opinion

Abuso sexual di Mucha: e dos bandanan di medaya

E lugar cu muchanan ta ocupa actualmente den comunidad, tabata topico di varios articulo, cu a keda presenta pa nos ultimo simannan. Reaccionnan di publico ta demostra cu ta e topiconan aki ta haya mayor interes di publico. Nos ta completamente di acuerdo cu e momento a yega pa porfin habri discusion sincero ariba e posicion di muchanan den comunidad y tambe asuntonan manera abuso sexual di muchanan.

Cu ayera y awe muchanan ta bira victima di abuso sexual, abuso fisico y tambe victima di falta di mayornan cu ta realmente mayor, ta un hecho. Pero cu awe e problema ta pinta su mes na forma mucho mas agudo, tambe ta un hecho. Abuso sexual di mucha ta un problema cu dos banda di medaya. Pero e dos bandanan ta muestra dede den mes direccion!

MACHISMO Y DEGENERACION DI HOMBER

Un homber tin derecho di abusa di otro homber, di un muher o di un mucha na cualquier forma? E contesta ta mas cu claro. Ningun hende tin derecho pa abusa di ningun forma di ningun hende. E palabra abuso ya ta significa cu ta trata di un acto directo contra e valor di hende!

Cu abuso sexual contra muchanan ta tuma lugar, tin varios motibo. Ta berdad cu ayera tambe tabata tin abuso sexual di mucha. Mester ta asina, pasobra un homber cu ta bebe te cu e no por para ariba su pia mas, ta bira un hende sin concenshi, sin razonamento, cu solamente ta actua a base di su instinto. Den e situacion aki, e ta ataca loke e topa cune den su caminda.

Loke sin duda ta aporta na e abuso sexual contra muchanan ta e mentalidad di machismo, cu lamentablemente ta worde considera como un etiketa di excelencia pa homber. Pero den su raiz e no ta nada mas cu un degeneracion di homber, cu ta perde su valor di hende pa bira bestia.

Machismo tin di haci cu educacion ekiboca, cu ta basa ariba posicionnan increible. Por ehemplo, ta worde bisa cu si un homber pasa den lodo e ta keda limpi, pero si un muher pasa den lodo e ta bira sushi. Berdad ta, cu tanto homber como muher cu pasa den lodo, ta susha nan culpa. Mescos, cu un muher cu ta pasa di un man pa otro ta perde su valor, mescos e homber cu ta pasa di un muher pa otro, ta entrega su valor, ta perde su

E lugar cu muchanan ta ocupa actualmente den comunidad, tabata topico di varios articulo, cu a keda presenta pa nos ultimo simannan. Reaccionnan di publico ta demostra cu ta e topiconan aki ta haya mayor interes di publico. Nos ta completamente di acuerdo cu e momento a yega pa porfin habri discusion sincero ariba e posicion di muchanan den comunidad y tambe asuntonan manera abuso sexual di muchanan.

respet.

Machismo, manera e ta worde traduci den bida di tur dia, ta significa cu e homber por core paranda tur dia, bebe te perde conocimiento y acumula amores ariba su caminda. Macho ta bira igual na: podera di tur loke bo por topa cune. Un pensamiento sumamente primitivo, cu ta encera cu e homber cu ta siguidor di machismo, ta deshaci di su otro elementonan importante como hende pa bira un animal rabioso. Den e proceso aki e ta perde control ariba limitenan. Degeneracion ta culmina, ora pa un homber, muher bira obheto sin valor, cu un solo obheto. E ora edad no ta conta mas. Concenshi no ta conta mas. Un tiger ta busca satisfaccion.

UN ARMA FALSO Y UN VICTIMA

Mientras machismo no ta algo di awor, hecho ta cu awor el a topa cu mihor aliado pa sigui progresa. E mihor aliado di machismo ta justamente loke hopi muher ta mira como un arma, pero cu ta solamente un arma falso. Un malinterpretacion di emancipacion a trece cune cu muhernan, enbez di tranca machismo exigiendo respet, a bay sirbi machismo mas y mas ora nan a bandona nan valor.

E muher emancipa hopi biaha ekibocadamente ta worde pinta como un muher, cu no tin tempo pa su cas; un muher, cu ta hunga macho. E pensamiento, cu si e homber por core caya e muher tambe por, no ta alimenta emancipacion di muher, pero mas bien ta alimenta degeneracion di homber y muher.

E proceso ta culmina, ora homber y muher perde nan identidat di hende, den e sentido mas profundo di palabra. E victima ta bira e ora muchanan, cu mester paga e cuenta. Si ayera ya tabata tin elemento, cu a conduci na abuso sexual di mucha, awe cambianan di normanan te na un limite cu bagamunderia a worde legaliza inoficialmente, ta haci mas mucha victima, di loke adulteron ta crea.

LOKE A BAY PERDI: E HOGAR

Den e cambianan, un parti importante den bida di hende a bay perdi: e hogar. Kico a socede? Aspectonan importante di hende como hende a worde poni un banda. Cantidad di relacionnan, pasobra hopi biaha no por duna e number "familia" mas na convivencia, no conoce e aspectonan tan importante di respet, valor, compaferismo. Hopi matrimonio ta basa ariba legalizacion oficial o no oficial di un atraccion o deseo sexual y nada mas.

E forma cu familianan ta worde forma, si ainda forma familia, ta haci e gran diferencia. Soño di un pareha recien casa por ehemplo, ta bira cu hunto por compra un auto mas grandi, un cas mas bunita, mas paña bunita, cu cual mester sigui atrae otro pasobra si e homber o muher bira menos bunita, relacion a kibra. Ta planea pa e promer siete añu no bini yiu o ta saca yiu completamente for di programa. Si na caminda yiu presenta, ta mande bay na tempo y ta busca abortus. Problema solucion!

CUANTO UN MUCHA BAL?

Cuanto un mucha bal? Un pregunta, cu nos mester haci nos mes den e pakete total. Pasobra si nota actitud di cierto mayornan, mester bisa cu e mucha no bal nada!

Pakico ta yega na e conclusion aki? Compara e atencion cu ta worde dedica na un yiu y e forma cu ta vigila algo di valor material. Un hende, cu caba di cobra, ta warda su placa bon. E ta pone na banco o ta percura pa ladron no mishi cune. Si ta un suma grandi di placa e tin den cas, e lo no cera wowo anochi. Pero si asina ta haci cu material, si ta tuma prevencion pa ladron no bay cu television y video, renchi di diamanta y placa, ki prevencion ta tuma pa proteha e mucha? Si un pareha tin algo costoso den cas y e sa cu ladron por pasa cualquier rato, tur dos ta sali bay laga e articulo costoso

na man di ladron? Pakico ta hacie cu mucha si?

Cuanto un mucha bal? No por ta berdad cu un mama stima su yiu asina tanto y constantemente e no ta vigila e interes di e mucha. Ta berdad cu tur hende por cansa pa un rato y ta pone e mucha drumi pa e mama tambe haya tranquilidad. Pero na momento cu un mama, cu a pone e mucha na mundo, haya cu e mucha ta strobe, algo dramático ta pasa. E mucha no tin e valor cu e mester tin den vista di su mama!

E BERDAD DI ABUSO SEXUAL DI MUCHA!

E berdad di abuso sexual di mucha ta, cu e ta e culminacion di perdida di nocion di valor y prioridad di hende. Abuso sexual di mucha ta worde cultiva den e mal ehemplo cu muchanan ta haya di mayornan, cu mester hunga moderno. Mayornan, cu ta crea e ambiente perfecto pa exceso. Mayornan, cu ta transforma nan cas den un palacio di erotismo. Pelicula pornografico, chistanan sin sabor, relacionnan amoroso abiertu, falta di decencia absoluto, buracheria y droga.

E berdad di abuso sexual di mucha ta, cu e ta culminacion di perdida di nocion, kico un mayor ta. Si un parha ta cuida su yiuunan te ora nan por bula pa nan no muri, hende no kier tuma e molestia ey mas. E mucha no por conta cu e sosten di su mama, cu ta keda ayera, awe y semper e promer contacto entre e mucha y mundo y hunto cu e tata ta guia e mucha, ta dune proteccion tambe contra mentenan maligno.

Mescos cu no ta confia ningun hende cu bo placa, con bo kier confia bo yiu na ningun hende?

Si ayera ya abuso sexual tabata conoci, awe el a haya un dimension mayor, pasobra loke tabata stroba mas abuso sexual, awe a basha abau. Pasobra abuso sexual ta simplemente cu hende no ta mira su mes como hende, no ta comporta su mes como hende y no por considera otro hende, sin tene cuenta cu edad!

TRAS DI CADA EXITO TIN UN MAMA Y UN TATA

Ta berdad cu tin mucha, cu ainda ta scapa bista di nan mama y nan tata. Ta berdad, cu pa bon cu e vigilancia por ta, algo por socede. Pero ta keda un berdad: e guia, e proteccion, cu un mama y tata ta brinda nan yiu.

Si ta malinterpretacion di emancipacion ta conduci na tanto problema, ta bon pa tur hende regresa na nan raiz. Si tin diferencia fisico entre homber y muher ta pa un obheto: multiplicacion di raza humano. Ta a base di e diferencia aki e muher por yama su mes muher y e homber por yama su mes homber. Pesey hamas un muher, cu ta dedica su mes na su cas y su yiuunan por worde poni na un escalera mas abau cu un muher cu a forma un carera. Hamas un tata, cu ta percura pa su familia, por worde considera menos homber cu esun cu ta bula pipa pa responsabilidad y ta hoga den paranda!

Ta ora pone hende den contexto di normalidad, por bay deshaci di e pakete total, cu ta conduci na tanto problema agudo den un comunidad, cu ta trata di sinti su mes feliz den abundancia economico, pero ta hoga den otro tipo di problema.

Normalidad ta significa cu mayornan ta responsable pa e mucha. Tras di cada mucha, cu crece bira un persona exitoso, tin un mama y un tata, cu por a keda pover pero a cumpli cu nan tarea. Pero tras di cada mucha fracasa, tambe tin un mama y un tata, cu por a acumula posesion, pero na caminda a kibra nan yiu o a permitie di worde kibra!

INSPECTORATE (Chas Martin Co.)

needs

two (2) experience oil inspectors

Contact TEL

Aruba: 31659

Curacao: 618060

614269